

# SANTAGEDA

## birjina eta martiria



### Sarrera-oharra

Decio enperadore erromatarren aldietan aurrean erabilte izugarriak sufritzen eben kristinauek. Quintiano Siciliako Consul ordezkioak Agedaren emakume gozotasunak eskuratu nahi zituan; eta ezin lortuta, heriotzara emon eban, lehenengo bularrak moztuta, eta gero ikatz gori gainean tatarrez erabilita.

Ageda hil eben hurrengo urtean, Etna su-mendia eraginean hasi zan. Agedaren bitartekotasuna eskatu eben, eta su-goria Kataaniako ateetan gelditu zan. Orduetik betako zaindari dabe.

210ean jaioa, 251n hil eben.

Gure artean ere ospe handia dauka santa honek, eta ez, horraitino, *birjintasuna* estimatzen dalako... Ea Agedak Kristorengana garoazan eta ausardiaz emoten dogun, harek lez, gure kristautasunaren testigutza.

### Sarrera abestia

**GOAZEN ALKARTURIK** biztuta fedea  
argitan zabalik maitasun bidea.

*<sup>1</sup> Entzun dezagun apaltasunez  
entzun dezagun Jaunaren hitza  
Bere hitzetan gure egia  
gure indarra gure bizia.*

*<sup>2</sup> Gurekin dogu maisu ta lagun*

*gurekin dogu, gurekin, Jauna!  
Egin dezagun zuzentasunez  
ta maitasunez bere esana!*

### **Abadearen agurra**

† Aitaren eta Semearen eta Espiritu santuaren izenean.  
—Amen.

† Gure ahulezietan / bere ahalmenaren indarra  
agertzen deuskun Jauna / izan bedi zuekin.  
—Eta zure espirituarekin.

### **Damu-otoitza**

Gure zaindariaren eguna eukaristiaren mahai inguruan ospatzeko alkartu garanok, autortu daigun Agate deunaren fede-sendotasuna eta gure fedearen makaltasuna, eta hartu daigun babes Jainkoaren errukian:

- Jesus Jauna, Jainkoaren nahia bilatzen zenduana.  
*Erruki, Jauna!*
- Jesus Jauna, Jainkoaren erreinua iragarten zenduana.  
*Kristo, erruki!*
- Jesus Jauna, makalak indardun bihurtzen dozuzana.  
*Erruki, Jauna!*

### **OTOITZA**

Jauna, zeure gogoko izan zenduan  
Agata birjina eta martiri santua,  
bai bizi izan eban birjintasunaren ederrez,  
bai eta martiritzan erakutsi eban indarrez ere;  
emoiguzu, haren otoitzari esker, zeure parkamena.  
Zure Seme Jesu Kristo gure Jaunaren bitartez,  
Zurekin eta Espiritu Santuarekin batean  
Jainko eta errege bizi da-eta gizaldi eta gizaldietan.

## HITZAREN LITURGIA

### 1Pe 3, 14-17

*Jesu Kristoren sinismenean bizi izatea gaur gatxa dala badinogu, zer esango ete eben lehenengo kristinauek eta, geroxeago, aurrean erabiliak ziranean? Danen adorea indartzera datoz Pedro apostoluaren hitzok.*

### San Pedro apostoluaren lehenengo idazkitik

Senide maiteok: Zorionekoak zuok, zuzenagaitik eroan-beharrik izaten badozue. Ez izan hareen bildur eta ez ikaratu.

Goratu egizue Jauna, Kristo, zuon bihotzetan, eta prest egon beti, zuon itxaropenaren arrazoibidea emoteko, eskatzen deusueen guztiei; baina era onean eta begirunez, barrua garbi dozuela. Holan, zuen kontra esaten dabena, lotsagarri bihurtu dakioen, zuen kristinau jokabide ona baltzitzen dabenei.

Hoba da, Jaungoikoak holan nahi badau, ondo eginez nekeak izatea, txarto eginez baino.

**Jaunak esana**

### Erantzun salmoa 030

Agate Deuna Sal 030 Udaia 24

Zeu-re es-ku-e-tan iz-ten dot, Jau-na, ni-re bi-zi-a.


**R/. Zeure eskuetan izten dot, Jauna, nire bizia.**

Izan zakidaz harri babesle,  
gatzelu salbatzaile.

Zeuren zaitut-eta neuren hatx eta **g**atzelu,  
zeuren izenaren ohorez eroan nagizu eta **g**idatu. R/.

Zure eskuetan izten dot neure **b**izia;  
 askatu nagizu, Jauna, Jainko **le**iala.  
 Poztu eta alaituko naz zure maitasunagaitik,  
 erreparatu deutzazu-eta nire atsekabeari,  
 arduratu zara nitaz larri**al**dian. R/.

Libratu nagizu arerio eta pertsegitzailen **es**kutik.  
 Erakutsi aurpegi argia zerbitzari honi,  
 salbatu nagizu zeure mait**as**unaz. R/.



### (R/. Aleluia.)

V/. Zorionekoak zuek,  
 kristau izateagaitik iraintzen bazaituee,  
 Jainkoaren Espiritu aintzatsua  
 zuengan dagoala esan nahi dau-eta horrek. (R/.)

### Mt 10, 34-39

*Bere sinismena txantxetan hartzen dauanak, eta ez benetan, ezin izango dauz onartu Jesus Jaunak bere ikasleei zuzentzen deitsezan berbok. Egin deiegun harrera on Aleluia abestuz, zutunik.*

### † Jesukristoren ebanjelioa san Mateoren liburutik

Aldi haretan, Jesusek esan eutsen apostoluei: «Ez uste izan munduari bakea ekartera etorri nazanik; bakea ez, banaketea ekartera etorri naz. Bai, semea aitagandik banatzera etorri naz, alabea amagandik eta erraina amaginarrebagandik banatzera. Eta edonork

bere etxekoak izango ditu arerio.

Aita nahiz ama Ni baino maiteago dauana ez da Niretzat gai; semea nahiz alabea Ni baino maiteago dauana ez da Niretzat gai. Bere kurutzea hartu eta jarraitzen ez deustana ez da Niretzat gai. Bere biziaren jabe izan nahian dabilanak galdu egingo dau; bere bizia Nigaitik galtzen dauanak, oster, eskuratu egingo dau».

## **Jaunak esana**

### **HOMILIA**

### **ESKARIAK**

† Jesukristo maite ebalako azkeneraino jarraitu eutson Santagedaren eskutik egin daiguzan gaurko eskariak:

—Eleizearen alde: bere seme-alabek maite izan daien, zerbitzatu daien, bizkortu daitezcan eleizgintzan esku hartzeko, *eskatu deiogun Jaunari*.

—Bizitza gero ta erosoago ta hobeago baten atzean gabizanak gure ingurura ere begiratu daigun, eta gogoan hartu daiguzan bizitza hobeago bat bilatzen gure artera datozenak, *eskatu deiogun Jaunari*.

—Ondasunak banantzeko dirala argi izan daigun, eta bilatu daigun «Caritas»egaz eten bako konpromisua izatea eta gure ondasunak alkarbanantzea, *eskatu deiogun Jaunari*.

—Eukaristia hau ospatzeko alkatu garanon alde: Jainkoari non eta zelan entzun ikasi daigun, eta esker onezko erantzuna emon ahal izan deiogun Santageda eredu dogula, *eskatu deiogun Jaunari*.

† Zure Barri Onaren autorle nahi gaituzun Jainko Aita: egin gaizuz geu ere Santagedaren antzeko sutsuak

gure sinismena autortzen. Jesukristo gure Jaunaren bitartez.

—Amen.

## **EUKARISTIAREN LITURGIA**

### **Eskeintza**

Bedeinkatua zu, Jauna, zeru-lurren Jainkoa, zeure esku zabaletik hartu ditugu orain ekarri deusuguzan ogi-ardauok, lurraren indarrak eta gizakiaren lanak sortuak: honeexek egingo jakuz biziaren ogi ta betiko zorionaren edari.

—Bedeinkatua zu, Jauna, orain eta beti.

Senideok: egin daigun otoitz, guztiok batean, Eliza osoaren oparia Jaungoikoari eskeintzerakoan.

—Jainkoa goresteko eta gizakiak salbatzeko.

### **Oparien gainekoa**

Atsegingarri izan bekizu, Jauna,

Agate santuaren egunean egiten dihardugun eskeintza,

beraren martiritza atsegingarri izan jatzun lez.

Jesu Kristo gure Jaunaren bitartez.

### **Prefazioa**

V./ Jauna zuekin..... R./ Eta zure espirituarekin

V./ Gora bihotzak .....R./ Jaunagan daukaguz

V./ Eskerrak Jaungoiko gure Jaunari.....R./ Egoki da eta zuzen.

Egoki da, bai, eta zuzen, bidezko eta salbagarri,

nonahi eta beti guk Zuri eskerrak emotea,

Jauna, Aita guztiz santu,

Jainko ahalguztidun betiko horri.

Kristori jarraituz, Agata birjina martiri santuak

zure izena autortzeko isuri eban odolak

argi erakusten ditu zure miragarriak:

gure makaltasunean zeure ahalmena agertzen dozu  
eta indartsu egiten indarrik bakoa,  
zure testigu izan dadin,  
Jesu Kristo gure Jaunaren bitartez.

Horregaitik, zeruko indar guztiekin,  
lurrean beti eta beti gorespen zaitugu,  
Zuri, Jainko guztiz handi horri,  
eten barik [esanez] kantatuz: Santu, santu, santua...

### **III. Eukaristi-Otoitza**

Santu zara, bai, Jauna,  
eta diran guztiek emoten deusue behar dan gorespenean.  
Zure Seme Jesu Kristo gure Jaunaren bitartez  
eta Espiritu Santuaren indarrez,  
Zeuk biziazoten dituzu guztiak eta santutzen  
eta Zeuk diharduzu beti eta beti zeure herria batzen,  
eguzkialde batetik besteraino opari garbia eskeini dakizun.

Apalik, beraz, Jauna, eskatzen deusugu:  
egin daizuzala santu, zeure Espirituaren indarrez,  
oparitako ekarri ditugun ogi-ardao honeek,  
zure Seme Jesu Kristo gure Jaunaren  
Gorputz eta † Odol egin daitezana,  
misterio honeek berak agindurik egiten ditugun ezkeror.

Berak, saldu eben gau haretan,  
ogia hartu eta, Zuri eskerrak emonez,  
bedeinkatu eban,  
zatitu eta bere ikasleei emon eutsen, esanez:

HARTU EIZUE ETA JAN GUZTIOK HONETATIK:  
HAU NEURE GORPUTZA DA-ETA,  
ZUENTZAT EMONGO DANA.

Era berean, afalondoan, kaliza harturik,  
Zuri eskerrak emonez, bedeinkatu eban  
eta bere ikasleei emon eutsen, esanez:

HARTU EIZUE ETA EDAN GUZTIOK HONETATIK:  
HAU NEURE ODOLAREN KALIZA DA-ETA,  
ITUN BARRI ETA BETIKOAREN ODOLA,  
ZUENTZAT ETA ASKORENTZAT  
PEKATUAK PARKATZEKO ISURIKO DANA.  
EGIZUE HAU NEURE OROIGARRI.

### **Hau da sinismenaren misterioa.**

Hil eta biztu zarala, Jauna,  
Zu barriz etorri arte, hau dogu, hau, barri ona!  
Horregaitik, Jauna, guk,  
zure Semearen nekaldi salbagarria eta hilen artetik biztea  
eta zeruratze miragarria gogoratuz,  
haren azken etorrera itxaroten dogula,  
Zuri eskerrak emoteko eskeintzen deusugu  
sakrifizio bizi eta santu hau.

Begira, Jauna, zeure Eleizearen eskeintza honi;  
ikusi eskeintza honetan  
Zurekin baketu gaituan Jesu Kristoren oparia;  
egizu, Jauna, zure Semearen Gorputza eta Odola  
hartzten ditugunok,  
Espiritu Santuaz beterik, Jesu Kristogan  
gorputz bat eta espiritu bat izan gaitezala.

Berak egin gaizala Zuretzat betiko opari,  
zure aukeratuekin zerua jaritsi daigun:  
lehenengo, Maria guztiz dohatsua,  
Jainkoaren Ama beti Birjinarekin,  
haren senar Jose santuarekin,  
zure Apostolu eta martiri santuekin,  
**Agate birjina martiri** santuarekin eta santu guztiekin;  
badakigu, honeen bitartez  
zure laguntza izango doguna nonahi eta beti.

Gu Zurekin baketzen gaituan opari hau izan bedi, Jauna,  
mundu guztiarentzat bake eta salbamen.

Mundu honetako ibilaldian,



bete egizu sinismenez eta maitasunez zeure Eleizea:  
zeure zerbitzari Frantzisko gure Aita Santua,  
Joseba gure Gotzaina,  
beste gotzain eta eleizgizon(-emakume) guztiak  
eta zeurea dozun herri osoa.

Entzun, bihotz onez,  
zeure aurrera deitu dozun familia honen otoitzak;  
Aita guztiz ona, erakarri Zeugana  
mundu zabalean banaturik dabiltzan zeure seme-alabak.  
† Hildako gure senideak (...),  
eta mundu honetatik Zurekin adiskide joan diran guztiak,  
hartu eizuz bihotz onez zeure zeruan;  
geuk ere sinisten dogu  
zure aintzaren zorion betea izango dogula betiko,  
eurekin batean, Jesu Kristo gure Jaunaren bitartez;  
beronen eskuz emoten deutzazuz  
ondasun guztiak munduari.

HONEN BITARTEZ, HONEKIN ETA HONENGAN  
ZURI, AITA, JAUNGOIKO AHALGUZTIDUN HORRI  
ESPIRITU SANTUAREKIN BATEAN  
OSPE TA AINTZA GUZTIA  
GIZALDI TA GIZALDI GUZTIETAN.

—Amen.

Salbatzaileak agindu ta irakatsiari jarraituz  
bildur barik esan dagigun.

<b>GURE AITA</b> zeruetan zarana	egun honetako ogia;
santu izan bedi zure izena,	parkatu gure zorrak
etor bedi zure erreinua,	geuk ere geure zordunei
egin bedi zure nahia	parkatzen deutsegun ezkeror;
zeruan bezela lurrean ere.	ez eiguzi itzi tentazinoan
Emoiguzu gaur	jausten,
	baina atara gagizuz gatxetik.

† Atara gagizuz, Jauna, gatx guztietatik,

emoiguzu bakea gure egunotan,  
zure errukiari esker  
pekatutik gabi bizi izan gaitezan  
eta estualdietan sendo;  
betiko zorionaren itxaropenean,  
Jesukristo gure Salbatzailea  
noiz etorriko dan zain gagozela.

- *Zeurea dozu erregetza;*  
*zeureak ospe ta indarra orain eta beti.*

**BAKE ESKEINTZEA** (Abadeak)

† Jesukristo gure Jauna, zeuk esana da apostoluei 'bakea izten deusuet, neure bakea emoten'; begira zure Eleizearen sinismenari eta ez gure pekatuei, eta zeure gogoia danez, emoiozu eleizeari bakea, emon batasuna, errege bizi zara-ta, gizaldi eta gizaldietan.

— *Amen.*

† Jaunaren bakea beti zuekin  
—*Eta zure espirituarekin.*

† Emoiozue bakea alkarri.

Jaungoikoaren Bildotsa,  
zeuk kentzen dozu munduko pekatua: *Erruki, Jauna.*

Jaungoikoaren Bildotsa,  
zeuk kentzen dozu munduko pekatua: *Erruki, Jauna.*

Jaungoikoaren Bildotsa,  
zeuk kentzen dozu munduko pekatua: *emoiguzu bakea*

## JAUNARTZEA

† Hona hemen Jainkoaren Bildotsa, hona munduko pekatua kentzen dauana: zoriontsuak honen mahaira deituak:

—Jauna, ni ez naz inor zu nire etxean sartzeko,  
baina esaizu hitz bat eta osatuko naz.

## Jaunartzean

HONA BILDOTS EZTIA / EGIATZKO OGIA

ZERUTIK DA JATSIA / JAINKO MAITIA.  
GURE ARTZAIN ONA TA EGILEA  
AITARIK MAITEENA, ZERU-EMOILEA.  
OSTIAN ZAOZALA DOGU SINISTEN  
ZERUAN BEZELA HOR GU MAITATZEN.  
ZINEZ GURTZEN ZAITUT, JESUS EZTIA.  
ARREN, EMOIDAZU GOI-SINISTIA.

<sup>1</sup>. Ogi hau jaten dauanak izango dau bizia.

Kaliz hontan aurkitzen da Jainko-odol guztia:

**R/. Hor dogu janaria ta hor gure edaria.**

<sup>2</sup>. Jaungoikoak deitzen gaitu: bera dogu janari.

Beragan dogu aurkitzen osasuna ugari.

**R/. Zelan begiratzen deutson Jainkoak gizonari!**

<sup>3</sup>. Danok gaur jaten badogu ogi bat mahai batean  
ezin izan gorrotorik gaurtik gure artean.

**R/. Alkar maitatu dagigun Jesusen izenean.**

### **Jaunartze ondorengoa**

Oi Jainko, santuen koroa emon zeuntsan Agate santuari  
birjina eta martiri izan zalako;  
emoiguzu, sakramentu honen indarrez,  
gatx guztiak gaingidurik, lortu daigula zeruko ospea.  
Jesu Kristo gure Jaunaren bitartez.

### **Azken onespina**

† Jauna zuekin.

—Eta zure espirituarekin

*(buru makur)*

Poztu dadila, Jauna, kristau herria,  
zure Semearen gorputzeko atal diran santuak gorestean;  
eta egizu, Santageda birjina martiriaren  
gomutaz alkartu garenok,  
haren antzera, egunen baten,  
lortu daigula betiko zoriona.

Jesukristo gure Jaunaren bitartez.

—Amen.

† Bedeinka zaizela Jainko ahalguztidunak:

Aaitak eta † Semeak eta Espiritu santuak.

—Amen.

† Zoaze Jaunaren bakean.

—Eskerrak Jaungoikoari.

Egoki da, bai, eta zuzen, bidezko eta sal-ba-ga-rri, no-na-hi eta  
 beti guk Zuri eskerrak e-mo-te-a, Jauna, Aita guz-tiz san-tu,  
 Jainko ahalguzti - dun be - ti - ko ho-ri. Kris-to-ri jarraituz,  
 Agate martiri san-tu-ak, zure izena autortzeko isuri eban o-do-lak  
 argi erakusten ditu zu-re mi-ra - ga-rri-ak: gure makaltasunean  
 zeure ahalmena agertzen do-zu-la-ko, eta indartsu egiten indarrik  
 ba - ko - a, zeure testigu izan da-din, Jesu Kristo gure Jau-na-  
 ren bi-tar-tez. Horregai-tik, zeruko indar guz-ti-e-kin, lurrean  
 beti eta beti goستن zai-tu - gu, Zuri, Jainko guztiz handi ho-ri,  
 e - ten ba - rik kan-ta - tuz: